

## Eachtra Robála

**Ceist 1** Beidh tú ag féachaint ar ball ar thuairisc faoi eachtra robála i nDún na nGall. Sula bhféachann tú ar an mír, an féidir leat féin agus an duine in aice leat Gaeilge a chur ar na focail / frásaí seo?

1. big sum of money \_\_\_\_\_
2. petrol station \_\_\_\_\_
3. fuel pump \_\_\_\_\_
4. security cameras \_\_\_\_\_
5. cash registers \_\_\_\_\_
6. safe (money) \_\_\_\_\_
7. a gang of robbers \_\_\_\_\_
8. remote \_\_\_\_\_
9. hanging about \_\_\_\_\_
10. in the neighbourhood \_\_\_\_\_

Féach ar an mír den chéad uair le feiceáil an gcabhróidh sé sin leat na focail a aimsiú.

**Ceist 2** Féach ar an mír den dara huair agus freagair na ceisteanna seo:

1. Measann na Gardaí i nDún na nGall go raibh ceangal idir dhá eachtra robála. Cé na háiteanna ar tharla an dá eachtra?
2. Déan cur síos ar an eachtra robála ar an Tearmann.
3. Cén fáth a bhfuil a lán grúpaí pobail ar aire anois i nDún na nGall?
4. Cad a dúirt úinéir an tsiopa ar an Tearmann faoi ghluaisteán dorcha?
5. Cad a deir Gardaí Bhaile na nGallóglach?

**Ceist 3** Bí ag obair leis an duine in aice leat agus féachaigí ar na logainmneacha a luadh sa tuairisc. Cad is brí leo?

**Dún na nGall**  
**An Tearmann**  
**Leitir Mhic an Bhaire**  
**Cill Mhic Réanáin**  
**An Craoslach** (craos = voracity/gluttony)  
**Baile na nGallóglach**

**Ceist 4**

Bhí an briathar saor (aimsir chaite) de na briathra seo a leanas le cloisteáil sa mhír. Scríobh amach an fhoirm cheart den bhriathar saor anois.

bris	_____
goid	_____
déan	_____
feic	go _____

Féach ar an tuairisc arís le feiceáil an raibh an ceart agat.

**Ceist 5**

‘...aréir...’

Cuir na focail seo, a chuireann am in iúl san aimsir chaite, in abairtí lena mbrí a léiriú:

- inné
- arú inné
- seo caite
- seachtain is an lá inniu
- an lá dar gcionn

**Ceist 6**

Pléigh na ceisteanna seo leis an duine in aice leat, nó le do ghrúpa.

1. Ar goideadh aon ní ort riamh? Cad a bhí ann?
2. Cén fáth a mbíonn daoine ag goid airgid, dar leat?
3. An bhfuil an leibhéal coireachta níos airde faoin tuath nó sna cathracha, dar leat? Cén fáth?

**Treoracha agus Freagraí**

**Ceist 1**

- |                      |                          |
|----------------------|--------------------------|
| 1. big sum of money  | <i>suim mhór airgid</i>  |
| 2. petrol station    | <i>stáisiún peitрил</i>  |
| 3. fuel pump         | <i>pumpa breosla</i>     |
| 4. security cameras  | <i>ceamaraí slándála</i> |
| 5. cash registers    | <i>scipéid airgid</i>    |
| 6. safe (money)      | <i>taisceadán airgid</i> |
| 7. a gang of robbers | <i>buíon gadaithe</i>    |
| 8. remote            | <i>iargúlta</i>          |
| 9. hanging about     | <i>ag crochadh thart</i> |
| 10. neighbourhood    | <i>comharsanacht</i>     |

**Ceist 2**

Féach an script.

**Ceist 3**

**Dún na nGall** – *The fort of the foreigners*

**An Tearmann** – *refuge, sanctuary*

**Leitir Mhic an Bhaird** – *small, steep hill of the son of the bard/poet*

**Cill Mhic Réanáin** – *the church of the son of Réanán*

**An Craoslach** (craos = voracity/gluttony) – *the voracious lake*

**Baile na nGallóglach** - *the town of the gallowglasses*

**Ceist 4**

bris	<i>briseadh</i>
goid	<i>goideadh</i>
déan	<i>rinneadh</i>
feic	<i>go bhfacthas</i>

**Ceist 5**

inné – *yesterday*

arú inné – *the day before yesterday*

seo caite – *last*

seachtain is an lá inniu – *a week from today*

an lá dar gcionn – *the day after*

**Ceist 6**

Is féidir gach beirt a chur ag déanamh an phlé seo agus ansin cuid de na ceisteanna a phlé leis an rang iomlán.

### Eimear Ní Chonaola

Tá Gardaí i nDún na nGall den tuairim go bhfuil ceangal idir eachtraí robála sa gcontae<sup>1</sup> le deireanaí. Briseadh isteach i siopa agus garáiste ar an Tearmann aréir agus goideadh suim mhór airgid. Measann na Gardaí go bhfuil go leor cosúlachtaí idir é agus robáil a rinneadh ar gharáiste i Leitir Mhic an Bhaird i mí na Samhna.

### Áine Ní Bhreisleáin

Ní raibh siopa ná stáisiún peitрил Mhic Suibhne ar an Tearmann i nDún na nGall foscailte<sup>2</sup> don phobal inniu, i ndiaidh eachtra robála ann aréir. Tá an gnó seo suite ar bhealach an N56 idir Cill Mhic Réanáin agus an Craoslach. Briseadh isteach insan<sup>3</sup> fhoirgneamh am inteacht<sup>4</sup> idir a leath i ndiaidh a naoi agus a seacht a chlog ar maidin agus rinneadh go leor damáiste taobh istigh. Briseadh na pumpanna<sup>5</sup> breosla agus rinneadh dochar do cheamaraí slándála istigh is amuigh. Briseadh na scipéid airgid agus bhí gadaithe ábalta an taisceadán airgid ag cúl an tsiopa a oscailt. Goideadh suim mhór airgid agus deir Gardaí go raibh na haláiraim slándála tiontaithe as ag na gadaithe, rud a deir siad a bhí cosúil le heachtra robála eile i Leitir Mhic an Bhaird ag deireadh na Samhna. Briseadh isteach i siopa agus garáiste Clerkin i Leitir Mhic an Bhaird, agus níl Gardaí ag cur as an áireamh go bhfuil buíon gadaithe i mbun na n-eachtraí<sup>6</sup> seo i gceantracha<sup>7</sup> iargúlta den iarthuaisceart.

Rinneadh go leor grúpaí pobail ar aire a bhunadh insa chontae anuraidh nuair a tharla sraith d'eachtraí gadaíochta i dtithe seandaoine agus i ngnónna<sup>8</sup> faoin tuath.

Deir úinéir shiopa Mhic Suibhne, nach raibh ag iarraidh labhairt ar an cheamara inniu, go bhfacthas carr dorcha ina raibh cúpla fear ag taisteal ann, ag tiomáint in aice leis an stáisiún breosla ar an Tearmann, ag a cúig a chlog ar maidin. Thiontaigh an carr in aice le cúlbealach agus tá na Gardaí anois ag déanamh fiosrúcháin faoi.

Deir Gardaí Bhaile na nGallóglach go bhfuil siad ag lorg eolais faoin eachtra robála seo ó dhuine ar bith a chonaic feithiclí nó daoine ag crochadh thart i gcomharsanacht an gharáiste am ar bith idir leath i ndiaidh a naoi ar aghaidh agus a seacht a chlog maidin inniu. Tá na Gardaí ag moladh do lucht gnó i gceantracha iargúlta de chontae Dhún na nGall, ach go háirithe, a bheith cinnte go bhfuil slándáil mar is ceart acu ar a gcuid foirgneamh.

Áine Ní Bhreisleáin, Nuacht TG4, ar an Tearmann.

---

<sup>1</sup> *sa gcontae* atá i gcanúint Chonnacht, *sa chontae* atá sa Chaighdeán Oifigiúil.

<sup>2</sup> *oscailte* atá sa Chaighdeán Oifigiúil

<sup>3</sup> Tá *insa/insan* ina leagan canúnach. *Sa/san/sna* atá sa Chaighdeán Oifigiúil.

<sup>4</sup> *éigin* atá sa Chaighdeán Oifigiúil

<sup>5</sup> *pumpáí* atá sa Chaighdeán Oifigiúil

<sup>6</sup> *na heachtraí* a deirtear

<sup>7</sup> *ceantair* atá sa Chaighdeán Oifigiúil

<sup>8</sup> *gnóthaí* atá sa Chaighdeán Oifigiúil